

AKASHVANI AIZAWL
REGIONAL NEWS BULLETIN
HEADLINES (EVENING)

1. Mizoramah vawiin khan National Sports Day pualin hun hman a ni.
2. Home Minister Pu K. Sapdanga'n ramchhunga Healthcare Facility Centre changtlung tak takah Mizote chu Nursing service-a thawhhlawk berte zing a mi an ni a ti.
3. Prime Minister Narendra Modia chuan vawiin khan Tokyo-a India-Japan Annual Summit vawi 15-naah Japan PM Shigeru Ishiba nen an tel.
4. Chief Justice of India B.R Gavai chuan vawiin khan Supreme Court judge thar pahnih Alok Aradhe leh Justice Vipul Manubhai Pancholi te chu rinawmna thu tiam tirin a lalut.

<><><>
LALREMSIAMI HMAR : NATIONAL SPORTS DAY

Mizoramah vawiin khan National Sports Day pualin hun hman a ni a,

India Hockey player Lalremsiami Hmar chuan he ni pual hian mipuite chibai a buk a, Hockey player ropui Major Dhyan Chand pian champhaphak puala he ni hmannah hian Hockey player a nihna angin a ngaihlu hle a, zahna chibai a buk tih a sawi bawk.

Lalremsiami chuan India in kum 2047 a ram hmasawn Viksit Bharat a thlen theih nan sawrkar laipui hmalakna hnuaiah infiamna kawnga hmasawnna tam tak a thleng tih a sawi a, sawrkar laipui hmalakna hnuaia hmasawnna chuan thalai tak tak eizawnna a hmuh bakah India hmasawnna chu khawvel mithmuhah a phochhuak a ti a,thalaite chu taksa hrisel zawk an neih theih nan leh natna hrang hrang laka inven theih nan taksa insawizawi leh infiamna ngaih pawimawh a tul thu a sawi.

<><><>
DAMPA BY-ELECTION

ZPM Party in Dampa bial bye election neih turah an candidate tur an puan tawh hnuah party dang ten he inthlan atana an inpuah chah tan thu an sawi a, party dang te hian candidate tur an la tifel lo a ni.

MNF Party chuan an President Pu Zoramthanga kaihhruaina hnuaiah Nomination Committee an din a, candidate tur ngaihtuah turin karleh tawhtanni khian an thukhawm dawn ni a thudawn a ni.

Congress party chuan Dampa biala ding tur ngaituah tu tur nomination committee an la dinlo tih an sawi a, Mizoram BJP hotute hnen atanga thu dawn danin Dampa bial bye election neih tura an party candidate tur nomination committee chu an thukhawm tawh a, an party candidate an tihfel hunah Prime Minister puantir an tum an ti a, party dang nena thawhho tumna erawh an ngaihtuahna ah ala awm rihlo tih an sawi bawk.

Hetih lai hian People's Conference Party chuan Dampa bial bye Election ah candidate neih leh neih loh chungchang an la ngaihtuah loh thu an sawi a ni.

BJP Mizoram chuan vawiin khan West Phaileng-ah mi thar lawmluhna runpui an nei a, BJP Mizoram State President Dr. K. Beichhua chuan thusawiin Mizoram politics-a hmalam hun êng ber neitu chu BJP a ni a, Congress leh MNF-te hun a liam hrih a, ZPM enchhin mekah mipui an beidawng mek a, chuvangin BJP hmalam hun a êng ber a ni, a ti.

Chhimlam bialin, BJP MLA pahnih an thlan tlin avangin hmasawwna project thahnem tak Central sorkar a pe mek tih Dr. Beichhua chuan sawiin, Siaha district leh Delhi an thlunzawm mek a, politics ah chhimlam bialin BJP an thlan tlin avanga Central sorkar kaltlanga malsawmna an dawn mek chu a temtu ni ve tur leh, Dampa bial leh Delhi thlunzawm ve turin bial mipuite chu a sawm a ni.

Congress Bhavan-a vawiina Congress Political session ah, MLA Pu C. Ngunlianchunga chuan thusawiin State University Aizawla din tum mek ngaihtuah chian a tul a ti a, Aizawl ah hian zirna in pawimawh zawng zawng heng MZU, NIT, ZMC, RIPANS, MCON, Law College, IASE, Vetty College, ICFAI leh College lian tak tak te a awm vek tawh a, chutih lai meka Aizawl bawka din tum a ni chu an ti lutuk a, Mizoram hmasawwna turin hmun dang tih hmasawn a ngai a ti..

RUSA Guidelines vangin Aizawlah bak a dah theih loh niin sawi a ni a, hei hi hriatsual a ni tih sawiin Congress an sawrkar anih chuan Lunglei ah Engineering College an din sak angin State University pawh hi an din leh mai ang a ti.



HOME MINISTER

Home Minister Pu K. Sapdanga'n ramchhung hmun hrang hranga Healthcare Facility Centre changtlung tak takah Mizote chu Nursing service-a thawhhlawk berte zing a mi an ni tih a sawi.

Wawiina Mizoram College of Nursing, Falkawnah zirchhuakte thlahna leh zirlai thar lawm luhna hun,’ 38th Graduation & Lamp Lighting Ceremony 2025’ a hmanpui naah he thu hi sawiin, Home Minister Pu K.Sapdanga chuan Mizoram College of Nursing-in tun dinhmun thleng thei tura tun hma leh tuna thawktute thawhrimna leh inpekna chu entawntlak a tih thu a sawi a. MCON zirlai leh zirchhuakte chu sawrkar behchhan kher ngai lova eizawnnatlak thiamna zirchhuah tum tlat turin leh an thiamna chu midangte tan a malsawmna ni thei tur khawpa tangkaia hmanng turin a chah a. BSc. Nursing thiamna nei thlalaite chu ram hausakna hlu tak an nih thu a sawi.

Home Minister chuan Mizo zingah India rama hna inziahtlin hautak bera a ngaih, UPSC-a inziaktling thei an awm ta mang lo chu manganthlak a tih thusawiin, Sawrkar hnuaia hna pawimawh tak chelh thei tura UPSC-a inziah tlin kawngah Mizo thlalaite an harh thar a pawimawh a ti a, Sawrkar hna thawktuten khawpui a awm tum ringawt rilru an neih thin chu paih a ngai tih sawiin, hmasawwna rualkhai a awm theih nan thiamna leh theihna hrang hrang nei thawktute chu hmun hrang hranga inzarpharh a pawimawh thu a sawi bawk.

MCON hi kum 2005-a kalpui tan a nih atangin zirlai 494 in an zirchhuak tawh a.Vawiin 38th Graduation & Lamp Lighting Ceremony 2025 ah hian BSc. Nursing zirlai thar mi 28 lawmluh an ni a, 17th Batch zirchhuak mi 30 thlah an ni. Zirlai titha chawimawina, ‘Academic Excellence Award’ leh ‘L.Chhawnkima Award’ chu zirlai 4 te hnenah hlan a ni bawk.



NGHAM

Non-Government Hospital Association of Mizoram (NGHAM) hruaituten Health Minister Pi Lalrinpuii'n private damdawi in ten MUHCS an zawm loh chhan chu sum chawi tur pe lova eninkawl- cashless an duh loh vang nia a sawi chu thu dik lo a ni tih an sawi.

Nilainia Legislative Assembly Session-a zawhna leh chhanna hunah Health Minister Pi Lalrinpuii chuan private damdawi in ten MUHCS an zawm loh chhan chu cashless an duh loh vang a nih thu a sawi a. Hetihlai hian NGHAM secretary Hmingtea Chhangte chuan NGHAM chuan MUHCS hnuaia cashless system an dodal ngai lo tih sawiin, sorkar hmasa hunlai khan cheng vbc 4 chuang an lo hloh tawh avangin private damdawi te chuan financial security rintlak tak an duh thung a ti a, NGHAM in MUHCS chungchanga an duhdan state sorkar hnena an thlen hnahnun ber tum, June ni 30 khan private damdawiin ten cashless system an hmang dawn a nih chuan damlo te chuan MUHCS package rate-in a huam theih bak te chu an pek a ngai dawn tih an sawi a, sorkarin he rawtna hi a remti lo a nih chuan NGHAM member damdawi in te rate an hman lai theuh chu hman phalsak turin an ngen a, hetihlai hian state sorkar chuan tun thlengin NGHAM rawtnate chu an la chhang lo a ni a ti.

Hei bakah hian NGHAM member hospital te tana financial security dah chu hospital pakhat chauh pawhin hman tur a nei tawh lo a nih chuan automatic-in NGHAM member hospital te chu Reimbursement System-ah an lut lailawk ang a, ni 30 chhunga financial security dah khah leh a nih chuan cashless in an kal chhunzawm anga, hetihlai hian huntiam chhunga financial security chu dah khah leh a nih loh chuan NGHAM member hospital te chu Reimbursement System-ah an awm hlen tawh turin sorkar hnenah rawtna an thlen bawk a ni.

Hetihlai hian MUHCS hnuaia inziahlul hun chu tun thla ni 31 hian khar a ni tawh dawn a, tun dinhmunah Chhungkaw 19471 an inziaklut tawh a ni.

Mizoram Health Care Society atanga thudawn danin MUHCS hnuaia Dam lo enkawl tawh zat hi an vaiin Mi 31263 an ni a, MUHCS bill Pawisa pek chhuah tawh zat chu cheng Vbc 42 leh nuai 6 a tling a ni.

Kan corr report lo ngaithla ang.

MUHCS hnuaiah hian Mizoram pawna Private Hospital damdawiin 25 ah a inenkawl theih a, Deemed Empanelled: 13 a awm a, Mizoram chhunga damdawiin 14 in an zawm tawh a ni.

MUHCS hnuaia inziaklut Sorkar hnathawkte te sum thawh zat hi thlatin cheng vbc 1 leh nuai 80 vel anga chhut a ni a, Pensionser te sum thawh zat hi thla tin cheng nuai 92 vela chhut a ni bawk a ni.

MUCHS hnuaiah hian damlo inenkawlina Bill an dawn apiang chu seniority-a check nghal a ni a, Bill approved apiang chu Kartin a hlawma pek chhuak zel a ni a. Pvt Hospital bill hi pek chhuah hmasak niin a hnuaah Public hospital bill siam leh nghal zel a ni.

Bill pek hun hi bill sibmit atanga ni 30 chhung tih ni mah se, Kartin pek chhuah zel a la ni, tih Health Care Society hotute chuan an sawi a ni.

<><><>

11 YEARS of PMJDY

Sorkar laipui hmalakna hnuaia pawisa ngai lova Bank account hawn theihna, Pradhan Mantri Jan Dhan Yojana hnuaiah Mizoram Rural Bank chu Mizorama account hawng an tam berna a ni.

Akashvani Aizawl zawhna chhangin, MRB head office, financial inclusion, manager Pu V. Lalrinmawia chuan PMJDY chu India rama mipui zawng zawng, mi harsa zawk te pawhin Bank account an neih theihna tura sorkar laipui hmalakna a ni a ti a, Mizoramah pawh Bank hrang hrangten hma an la tih sawiin, Mizoram pumah PMJDY account nei mi nuai 4, sang 3, 79 an awm a, chung zinga, account nuai 3, sing 1, sang 4, 259 chu Mizoram Rural Bank a mi a ni a ti a, mipa account nuai 1, sing 4, 5691 leh hmeichhe nuai 1, sing 6, sang 8, 568 an ni a, Mizoramah MRB chu PMJDY account hawng tam berna a ni a ti.

(Corr : Maremi)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM IN JAPAN

Prime Minister Narendra Modia chuan vawiin khan Tokyo-a India-Japan Annual Summit vawi 15-naah Japan PM Shigeru Ishiba nen an tel.

He summit ah hian hruaitu pahnihte hian India leh Japan inkara thawhdunna hrang hrangte zau takin an sawidun dawn a. Special Strategic and Global Partnership hmasawinna tur an sawiho a. Thuchhuah intawm an siamah PM Modia chuan vawiinah an sawihona chuan rah tha tak leh tum fel tak a neih thu a sawi a. Khawvel himna leh muanna atan India leh Japan inlaichinna tha chu a pawimawh a ni a ti bawk.

(Newsonair)

<><><>

SUPREME COURT

Chief Justice of India B.R Gavai chuan vawiin khan Supreme Court judge thar pahnih Alok Aradhe leh Justice Vipul Manubhai Pancholi te chu rinawmna thu tiam tirin a lalut. Judge pahnihte hi ni hnih kalta khan sawrkar chuan Supreme Court Judge atan a ruat a. Tun dinhmunah hian Supreme Court hian judge a neih theih zat 34 a nei kim leh tawh a ni.

(Newsonair)

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 125-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>